

27 AUG 2001

Mahathir-Patriotisme

PATRIOTISME BANTU KEKALKAN PEKERJA BERPENGETAHUAN DALAM NEGARA

PETALING JAYA, 27 Ogos (Bernama) -- Perdana Menteri Datuk Seri Dr Mahathir Mohamad berkata patriotisme seharusnya disemai di kalangan rakyat Malaysia ketika mereka masih muda supaya mereka lebih komited untuk berkhidmat kepada negara apabila mereka menjadi orang yang berpengetahuan.

Beliau berkata patriotisme akan membantu rakyat Malaysia yang berpengetahuan tinggi untuk menolak keinginan pergi ke luar negara bagi memperoleh pendapatan yang lebih tinggi.

"Kita mungkin perlu membuat Jalur Gemilang yang semakin besar dari semasa ke semasa dan berharap mereka akan tertarik kepada empat warnanya itu... untuk terus tinggal dalam negara dan mencintai negara," katanya secara berseloroh semasa sesi dialog dengan peserta persidangan nasional mengenai Wawasan Negara, Rancangan Malaysia Kelapan dan Penswastaan.

Sebelum itu Dr Mahathir telah menyampaikan ucaptamanya bertajuk "Mencapai Pertumbuhan Mapan, Mengukuhkan Ketahanan Ekonomi - Jalan Malaysia Ke Arah Kemakmuran" pada seminar itu di Bandar Sunway di sini.

Dr Mahathir berkata kerajaan sudah melakukan apa yang termampu olehnya untuk mengeluarkan tenaga kerja bagi industri yang penting seperti teknologi mahlumat (IT) tetapi pada masa yang sama negara juga menghadapi kemungkinan mereka meninggalkan negara untuk mendapatkan gaji yang lebih tinggi.

Biasanya seseorang pekerja akan tinggal dalam negara jika mereka diberikan gaji yang munasabah tetapi sukar bagi mereka untuk menolak tawaran seperti gaji yang 10 kali lebih tinggi yang dibuat oleh negara yang lebih kaya, katanya.

Walaupun banyak orang berpendapat pekerja yang pergi ke negara lain akan pulang juga akhirnya, dan membawa pulang wang dari negara kaya ke nagara asal mereka, andaian itu mungkin tidak selamanya benar.

Perdana Menteri berkata sesetengah daripada pekerja yang pergi ke luar negara sudah menjadi selesa di negara lain dan apabila mereka mula membesarkan anak-anak mereka di sana, mungkin ada di kalangan anak-anak itu yang tidak lagi menganggap Malaysia sebagai kampung halaman.

Apa yang boleh dilakukan oleh Malaysia ialah untuk terus melatih lebih banyak rakyatnya, dan tidak ada penyelesaian kepada masalah itu kecuali rakyat Malaysia sendiri bersedia untuk berkhidmat kepada negara dengan patriotisme dan komitmen yang tinggi.

-- BERNAMA
AFY AZZ NMO